

Uspješno zaključen prvi poslovni forum dijaspore u Jablanici

Na prvom poslovnom forumu jablaničke dijaspore pod nazivom **“Vaša prilika za sigurno ulaganje u budućnost”** okupili smo predstavnike poslovne zajednice, javnih institucija, privatnog sektora, dijaspore i investitore.

Ovaj događaj je bio prilika za predstavljanje mogućnosti za ulaganje u našu općinu, tradicionalno poznatu po prirodnim ljepotama i ukusnoj hrani, ali i simbol otvorenih vrata poduzetnim ljudima i brojnim poslovnim mogućnostima.

Čuli smo iskustva investitora koji su se odlučili vratiti u Bosnu i Hercegovinu i **pokrenuti uspješne biznise, kao i planove** koje Općina ima u sklopu projekta USAID Diaspora Invest.



Načelnik Šabanović: Ekonomska snaga dijaspore i veze sa lokalnim stanovništvom predstavljaju dobitnu kombinaciju



“Prvim skupom ove vrste i u saradnji s našim partnerima iz USAID Diaspora Invest želimo ojačati komunikaciju s dijasporom, znati koliko naših ljudi živi u iseljeništvu, ali i čuti njihova iskustva. Na taj način ćemo vidjeti šta mi u domovini možemo učiniti kako bismo te ljude uključili u lokalni razvoj. **Ekonomska snaga dijaspore i veze sa lokalnim stanovništvom predstavljaju dobitnu kombinaciju** koja unapređuje kvalitet života, ali i predstavlja pokretačku snagu zajednice. Želim da ovaj događaj postane tradicija i da ljudi znaju da je Općina Jablanica njihov partner.”

Damir Šabanović, načelnik Općine Jablanica

USAID Diaspora Invest: Uspostavljen je zajednički grant fond od 2 miliona dolara sa 30 partnerskih lokalnih zajednica širom zemlje

“Partnerstvo sa općinskim vlastima je jedan od ključnih elemenata u pristupu USAID-a pri uključivanju dijaspore u razvoj Bosne i Hercegovine. Kroz USAID Diaspora Invest projekat, u partnerstvu smo sa 30 lokalnih zajednica širom zemlje kako bismo im pomogli da identifikuju poslovne i investicione mogućnosti i kroz dobro osmišljene podsticaje za ulaganja privuku dijasporske investicije. Kao primjer dobre prakse, USAID je uspostavio zajednički grant fond od 2 miliona dolara sa partnerskim lokalnim samoupravama, koji je kapitalizovan odgovarajućim doprinosima Vlade SAD i lokalnih zajednica. Fond je pokrenut prije osam mjeseci i već smo podržali 14 različitih investicija dijaspore širom zemlje, sa dva investitora koja su locirana upravo ovdje u Jablanici. Ove firme trenutno zapošljavaju više od 40 radnika u ovoj zajednici i nadamo se da će u narednim godinama pružiti dodatne prilike za rast.”

Sanjin Arifagić, šef projekta USAID Diaspora Invest



Riječ investitora



“Moj put odlaska iz domovine je bio trnovit, ali vrijednim radom smo stvorili jednu od najuspješnijih firmi u državi Missouri u oblasti transporta. Svoja sredstva, volju, znanje i vještine uložio sam u nove biznise u rodnoj Jablanici s ciljem pružanja pomoći svojoj porodici i gradu. U proteklim godinama uložio sam preko pet miliona iz vlastitih sredstava i dobio naše kompanije. Danas granit iz Jablanice krase brojne svjetske trgovce, kao i prilaz mostu “Bitka za ranjenike”, na šta smo u ovoj kompaniji najviše ponosni.”

Fikret Poljarević, Granit Industry

“Iz Jablanice sam otišao u Njemačku prije 9 godina, nakon čega sam odlučio svoja znanja i vještine iskoristiti za ulaganje u IT kompaniju koja pruža usluge za projektima u okviru automobilske industrije, kao što je podrška za analizu softverskih grešaka. Na povratak me je potakla ne samo želja da se vratim u svoj rodni grad, već i da drugim visokokvalifikovanim mladim ljudima pružim mogućnost da se zaposle. Prezadovoljan sam postignutim rezultatima. Planirali smo zaposliti 10-ak ljudi, a uskoro zapošljavamo 20. osobu. Nakon mog povratka, na isti korak se odlučilo još nekoliko ljudi. Svi oni ili rade za njemačke kompanije ili su otvorili svoje i nastavili saradnju s inostranstvom. Što je više pripadnika bh. dijaspore i povratnika u našu zemlju, veće su mogućnosti da privučemo strane investitore.”

Dženis Motika, in-motion WiB



UVEZIVANJE DIJASPORE



Želite li i vi biti dio ove priče? Pridružite nam se u uvezivanju dijaspore!

Općina Jablanica daje priliku svim zainteresovanim sugrađanima iz dijaspore da daju svoj doprinos i budu dio razvoja zajednice. Pozivamo vas da popunite anketu koja ima cilj informisanje i uključivanje naše dijaspore u buduće aktivnosti općine. Upitnik je dostupan na web stranici Općine Jablanica, a link se nalazi ovdje:

UPITNIK